

HITZ BITAN

HIRIGINTZA. Aretxabaleta lau aldiz handituko da

Gasteiz ondoko herrixketan 3.759 etxe egitea onartu dute

Luis Karlos Garcia | GASTEIZ

Gasteiz Udalerriko kontzejuen-tzako Hirigintza Plan Nagusia behin-behinean onartu zuen atzo Gasteizko udalbatzak; PP, UA eta PSE-EEk alde bozkatu zuten, eta EAJ-EA, Batasuna nahiz EB-IUK, kontra. Planaren arabera, Gasteiz ondoko 63 herrixketan 3.759 etxebizitza eraikiko dituzte datozen urteetan (1.999 libre eta 1.750 babeseko).

Gasteizko nahiz bere inguruetako hirigintza eredua betiko ezaugarrituko duen plangintza garrantzitsua da. Adibidez, Aretxabaleta Gasteizen (hiriburutik hegoalderantz) bi mila etxetik gora egingo dira.

Ondorioz, planaren aurkakoek salatu dute herrixkaren populazioa gaurkoa halako lau izango dela gero. «Aretxabaleta Gasteizko auzo bat bihurtuko da», nabarmendu du oposizioak. Kasu berean izango diren kontzejuetara ohiko udal zerbitzuak (zabor-bilketa, garraio publikoa eta abar) zabaltzeak ekarriko duen kostuaz ere ohartarazi du.

Era berean, Kontzejuen Elkartek gogor kritikatu du Miñon hiru edo lau solairuko etxeak egiteko proiektua izatea. «Axolagabekeria galanta» dela uste du.

Batasuneko zinegotzi Jose Enrike Bertek, berriz, «hazkunde izugarria» proposatzea egotzi dio planari.

PSE-EEk dio espekulazioak 20 urte eman dituela Gasteizen

Gasteizko udal talde sozialistak ontzat hartu zuen PP-UAK taxututako plangintza, batez ere epeak «zehatz-mehatz» dakartzala ikusirik. Ildo horretan, PSE-EEko bozeramaile Patxi Lazcozek argudio gogorra bota zuen: «Espekulazioa egin ahal izateko gakoa hirigintza planen epeetan dago. Izan ere, eperik izan ezean, oso erraza izaten da espekulazioari eustea, Gasteizen 1982. urteaz geroztik gertatu den bezalaxe».

Kontzejuentzako Hirigintza Plan Nagusiari zuzenketak aurkezteko epea zabalik da. Gero, Gasteizko Udalak alegazioak aztertu eta dokumentua betiko onartuko du.

PRENTSA. «Izari zabalekoa eta ideia guztiei irekia» izateko irrika agertu du.



Hilaren 16an karrikan izanen da 'Euskal Herriko Kazeta'

Euskal Herriko Kazeta Ipar Euskal Herriko egunkari berriaren zero alea aurkeztu zuten atzo Hur Gorostiaga argitalpeneko zuzendariak eta Gil Haran Baigura SRLeko gerenteak Baionako Aviron Bayonnaisen egoitzan. Gorostiagak adierazi zenez, *Euskal Herriko* aktualitatea, «bere aniztasun eta soslai aberastasunean» aurkeztea da kazeta

berriaren xedea. Aniztasunak *Euskal Herriko* prentsan «bere tokia» duela azpimarratu zuen Gil Haranek. Argitalpenak 24 orrialde ukanen ditu, baina editorialik ez. Egunerok Ipar Euskal Herriko pertsona ezagun batek ematen du aktualitateari buruz duen iritzia. Orotara, 19 kazetari edo laguntzaile bilduko ditu.

ZIRKULAZIOA

Aurkako noranzkoan gidatzen zihoala istripua eragin zuen Atarrabiako gizona aurkitu duela dio Foruzaingoak

Iragan larunbatean Irurtzun eta Mugiro artean (Nafarroa) aurkako noranzkoan gidatu zuen J.F.R. 30 urteko gizonezkoa aurkitu duela jakinarazi zuen atzo Foruzaingoak. Trafikoaren segurtasunaren aurkako delitua leporatu diote, aurkako noranzkoan gidatzeaz gain istripu bat eragin zuelako. Izan ere, J.F.R.ren autoa ekidin nahi izan zuten bi auto bidetik irten ziren eta lagun bat arin zauritu zen.

ZEZENAK

Zezenketen aurkakoen protestaldia izan da Bilbon

Zezenketen Aurkako Nazioarteko Eguna zela eta, talde batek protesta egin zuen atzo Bilboko udaletxearen aurrean. *Tauromakia* ez. Ez gure diruarekin zioen pankarta zabaldu zuten zezenketen aurkakoek. Bilboko Aste Nagusiak iraun bitartean zezenketen aurkako 15.000 sinadura bildu dituztela ziurtatu dute.

EUSKARA

Elkarrekin jokatzeko eskatu die Euskaltzaindiak Eusko Jaurlaritzari eta Nafarroako Gobernuari

Euskara bultzatzeko orduan Eusko Jaurlaritzak eta Nafarroako Gobernuak elkarrekin jokatzeko «desiragarria» izango litzatekeela esan zuen atzo Iruñean Andres Urrutia Euskaltzaindiko kideak. «Erkidego bakoitzaren nortasuna errespetatu» behar zela adierazi zuen Urrutiak, baina euskara «guztion kultur ondarea» dela nabarmendu zuen. Onomastika Batzordeak prestatutako euskal pertsona izenen hiztegia aurkeztu zuen Euskaltzaindiak Iruñean. Emakumeentzat 1.430 izen eta gizonentzat 834 izen bildu ditu hiztegiak.

OSASUNA

Behin-behinean tabako produkzioa eta salmenta debekatzeko eskaera atzera bota du Bilboko epaitegiak

Bilboko bederatzigarren epaitegiak ez du onartu Espainian tabakoa ekoiztea eta saltzea behin-behinean debekatzeko eskatzen zuen salaketa. Bizkaiko Laringetokmizatuaren Elkartek sei tabako konpainien aurkako salaketa aurkeztu zuen urtarrilean, laringe minbizia sortzearen erruduntzat jo baitzituen. Maiatzean, berriz, badaezpadako neurri gisa eskatu zuen ekoizpena eta salmenta debekatzeko, baina ez du arrakastarik izan, epailearen arabera ez duelako argudiatu zer dela-eta ez zuen lehen salaketarekin batera eskatu. Nolanahi ere, tabako konpainien aurkako prozesua aurrera doa.

Gaixotasun psikikoei buruzko topaketak antolatu ditu Osasun Psikikorako Nafarroako Elkartek

ANASAPS Osasun Psikikorako Nafarroako Elkartek deiturik, gaixotasun psikikoei buruzko topaketak izango dira astelehene-tik asteazkenera Iruñeko Larraona ikastetxean. Gaixotasunei berriei buruz hitz egin beharrean, aurtun gaixoen tratamenduari buruz arituko dira jardunaldietan.

ABORTOA

Biharamuneko pilula %96 kasutan da eraginkorra, Lertxundi adituak ziurtatu duenez

RU 486 pilulak haurdunaldiak eteteko «oso modu eraginkorra» dela adierazi zuen atzo Roberto Lertxundik, Kontrazepzioaren Euskal Elkarteko presidentek. Lertxundiren arabera, erabiltzen den kasuen %96,4tan aborto osoa lortzen da. 2000ko apirilaren eta irailaren artean egin zuen azterketa Lertxundik, bi ospitaletan, biharamuneko pilula legeztatu eta berehala 490 emakumek hartu zuten garai horretan pilula eta horietatik %3,6k soilik egin zuten huts: kasuen %2,6tan abortoa ez zen erabat egin eta %1ean haurdunaldiak jarraitu egin zuen. Gasteizen egiten ari den Kontrazepzioaren Euskal Elkarteko bederatzigarren kongresuan aurkeztu zituen datuak Lertxundik. Sendagileak nabarmendu zuen RU 486 pilula haurdunaldia eteteko modu segurua izateaz gain, ez duela ia nahi gabeko ondorio-rik eragiten. Hori dela eta, gero eta gehiagok hartuko dutela iragarri zuen.

Hernaniko Udala

IRAGARKIA

Udal Pleno Batzarrak, 2001eko irailaren 27an egindako bilkuran, besteak beste, honako erabaki hau hartu zuen:

1.- "Hernaniko Hirigintza Planeamenduari Arau Subsidiarioen Elementuen Aldaketa Karabel, Akerregi eta Orbegozo eremuetan" izeneko egitasmoari hasierako onarpena ematea.

2.- Espedientea jendaurrean ikusgai jartzea, hilabetez, eta epe horretan hori aztertu nahi duen edozeinen esku jartzea, bidezkoak indultzen zaizkion alegazioak egin ahal izan dituzan.

3.- Mintzagai dugun egitasmoaren eremuan lur sailak zatikatzeko, eraikitzeko eta eraispentzeko egiteko baimenik ez ematea urte beteko epean.

Hernani, 2001eko urriaren 1a.
ALKATEA.

Hernaniko Udala

IRAGARKIA

Gobernu Batzordeak, 2001ko urriaren 3an, "Hernaniko Hirigune Historikoaren Urbanizazioa Eraberritzeko Obra Arruntren Proiektua - 2. Fasea: Kardaberaz Kalea eta inguruak, delakoari" hasierako onarpena ematea erabaki zuen.

Ekainaren 30eko 17/94 Legeak, Etxebizitzaren arloko premiazko neurriak eta Hirigintza Plangintzarako zein kudeaketako tresnak izapidetzeko neurriak zehazteari buruzkoak, 7. artikuluan ezarritakoa betez, espedientea jendaurreko ikusgai jartzen da, hamabost eguneko epean Obra eta Hirigintza sailko bulegoetan aztertu nahi duen edonoren eskueran gera dadin eta epe berean bidezko alegazioak egin daitezkeen.

Hernani, 2001ko urriaren 3a.
ALKATEA.